

نوينا عالسفر

خالص نوينا عالسفر	مالناش مكان بينكم هنا
العمر ضاع منا هدر	وتنهنا ما بين الخطا
مالقينا حُزن يَضُمُّنا	وبلدنا حِتّه منّا
وبدال ماتبكي حظنا	قولنا نَجَرَّب بختنا

خالص نوينا عالسفر مالناش مكان بينكم هنا

الحلم ضاع كده منّا	والفرح سابنا لوحدنا
وأملنا بنشوفه سراب	وبقينا غُرب ف أرضنا
حاولنا نفتح البيبان	يمكن نلاقي ف يوم مكان
ونحس بالدفا والأمان	عشان ده أبسط حَقنا

خالص نوينا عالسفر مالناش مكان بينكم هنا

سؤال مَحَيَّر من زمن	المصري ليه مالوش تمن
بين أهله ولا في غُربته	وده شئ عرفناه من زمن
مِدُّوا إيديكوا مانسافرش	نبني بلدنا ولا نخاطرش
نَعَلِّي فيها ولو بقرش	دي مصر عايشه ف دمنا

خالص نوينا عالسفر مالناش مكان بينكم هنا